



9 ապրիլի 2018 թ.

N 233-Ա

ք. Ստեփանակերտ

**ԼԵՈՒԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ ԳՅՈՒՂԱՏՆՏԵՍՈՒԹՅԱՆ
ՆԱԽԱՐԱՐՈՒԹՅԱՆ «ՏՈՀՄԱՅԻՆ ԿԱՅԱՆ» ՓԱԿ ԲԱԺՆԵՏԻՐԱԿԱՆ
ԸՆԿԵՐՈՒԹՅԱՆ ԲԱԺՆԵՏՈՄՍԵՐՈՎ ՀԱՎԱՍՏԿԱԾ ԻՐԱՎՈՒՆՔՆԵՐԸ
ՀԱՎԱՏԱՐՄԱԳՐԱՅԻՆ ԿԱՌԱՎԱՐՄԱՆ ՀԱՆՁՆԵԼՈՒ ՄԱՍԻՆ**

Հիմք ընդունելով Լեռնային Ղարաբաղի Հանրապետության քաղաքացիական օրենսգրքի 164-րդ, 954-րդ հոդվածները և ղեկավարվելով Արցախի Հանրապետության Նախագահի 2017 թվականի սեպտեմբերի 25-ի ՆՀ-108-Ն հրամանագրով սահմանված կարգի 6-րդ և 92-րդ կետերով, ինչպես նաև ելնելով Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերության գործունեության արդյունավետության բարձրացման անհրաժեշտությունից՝ Արցախի Հանրապետության կառավարությունը **ո ր ո շ ու մ է.**

1. Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերության Արցախի Հանրապետության սեփականությունը հանդիսացող բաժնետոմսերով հավաստված իրավունքները հանձնել «ԱԳՐՈ ԱՐՑ» սահմանափակ պատասխանատվությամբ ընկերության հավատարմագրային կառավարմանը:

2. Հավանություն տալ Արցախի Հանրապետության (կառավարման հիմնադիր) և «ԱԳՐՈ ԱՐՑ» սահմանափակ պատասխանատվությամբ ընկերության (հավատարմագրային կառավարիչ) միջև կնքվող Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերության՝ Արցախի Հանրապետության սեփականությունը հանդիսացող 100 տոկոս բաժնետոմսերով հավաստված իրավունքների հավատարմագրային կառավարման հանձնելու մասին պայմանագրի նախագծին՝ համաձայն հավելվածի:

3. Արցախի Հանրապետության գյուղատնտեսության նախարարին՝ Արցախի Հանրապետության անունից կնքել Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերության՝ Արցախի Հանրապետության սեփականությունը հանդիսացող բաժնետոմսերով հավաստված իրավունքների հավատարմագրային կառավարման հանձնելու մասին պայմանագիրը՝ հանդես գալով որպես հավատարմագրային կառավարման հիմնադրի ներկայացուցիչ:

4. Սույն որոշումն ուժի մեջ է մտնում հաստատման պահից:

«Հաստատում եմ»

**ԱՐՑԱԽԻ ՀԱՆՐԱՊԵՏՈՒԹՅԱՆ
ՊԵՏԱԿԱՆ ՆԱԽԱՐԱՐ**

Ա. ՀԱՐՈՒԹՅՈՒՆՅԱՆ

Պ Ա Յ Մ Ա Ն Ա Գ Ի Ր

ԼԵՈՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԳՅՈՒՂԱՏՆՏԵՍՈՒԹՅԱՆ ՆԱԽԱՐԱՐՈՒԹՅԱՆ «ՏՈՀՄԱՅԻՆ ԿԱՅԱՆ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ԲԱԺՆԵՏՈՄՍԵՐՈՎ ՀԱՎԱՍՏՎԱԾ ԻՐԱՎՈՒՆՔՆԵՐԻ ՀԱՎԱՏԱՐՄԱԳՐԱՅԻՆ ԿԱՌԱՎԱՐՄԱՆ ՀԱՆՁՆԵԼՈՒ ՄԱՍԻՆ

ԱՐՑԱԽԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ ԵՎ «ԱԳՐՈՂ ԱՐՑ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՄԻՋԵՎ

«___» _____ 201_ թ.

Ստեփանակերտ

Արցախի Հանրապետությունը, որի անունից Արցախի Հանրապետության կառավարության 2018 թվականի ապրիլի 9-ի N 233-Ա որոշման հիման վրա հանդես է գալիս Արցախի Հանրապետության գյուղատնտեսության նախարարը (այսուհետ՝ Կառավարման հիմնադրի ներկայացուցիչ) մի կողմից, և «ԱԳՐՈՂ ԱՐՑ» սահմանափակ պատասխանատվությամբ ընկերությունը, ի դեմս _____, որը գործում է _____ հիման վրա (այսուհետ՝ Հավատարմագրային կառավարիչ), մյուս կողմից, այսուհետ՝ միատեղ անվանվելով Կողմեր և առանձին՝ Կողմ և հաշվի առնելով, որ՝ Արցախի Հանրապետությունը կարևորում է Արցախի Հանրապետության տարածքում տոհմային գործունեության զարգացումը, տոհմային անասնաբուծության բնագավառում պետական ծրագրերի իրականացումը և հիմք ընդունելով Արցախի Հանրապետության կառավարության 2018 թվականի 9-ի N 233-Ա որոշումը, կնքում են սույն պայմանագիրը հետևյալի մասին.

1. ՊԱՅՄԱՆԱԳՐԻ ԱՌԱՐԿԱՆ

Սույն պայմանագրով Կառավարման հիմնադիրը Հավատարմագրային կառավարչին հավատարմագրային կառավարման է հանձնում Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերության (այսուհետ նաև՝ Ընկերություն) բաժնետոմսերով հավաստվող իրավունքները, իսկ Հավատարմագրային կառավարիչը պարտավորվում է ընդունել հիշյալ իրավունքներն ու դրանց կառավարումն իրականացնել՝ ելնելով իր և Ընկերության շահերից:

Սույն պայմանագրում օգտագործվող հասկացությունները.

Ստորև նշված հասկացությունները, որոնք օգտագործվում են սույն պայմանագրում, ձեռք են բերում ներքոհիշյալ նշանակությունը և մեկնաբանվում են հետևյալ կերպ՝

1) Արցախի Հանրապետության օրենսդրություն՝ Արցախի Հանրապետության օրենքներ և այլ իրավական ակտեր.

2) գույք՝ բաժնետոմսերով հավաստված իրավունք.

3) **ընկերություն՝** Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերություն, գրանցման համարը 443.120.11401, վկայականի համարը 02 Ա N 002065, ՀՎՀՀ 90026249, որի գտնվելու վայրն է քաղաք Ասկերան, Ն.Ստեփանյանի 53.

4) **կանոնադրություն՝** «Տոհմային կայան» փակ բաժնետիրական ընկերության կանոնադրություն.

5) **Կառավարման հիմնադիր՝** Արցախի Հանրապետություն.

6) **Կառավարման հիմնադրի լիազորած մարմին՝** Արցախի Հանրապետության գյուղատնտեսության նախարարություն.

7) **Հավատարմագրային կառավարիչ՝** «ԱԳՐՈ ԱՐՑ» սահմանափակ պատասխանատվությամբ ընկերություն, գրանցման համարը 445.110.1005323, ՀՎՀՀ 90343093, որի գտնվելու վայրն է քաղաք Շուշի, Աշոտ Բեկորի 4.

8) **հավատարմագրային կառավարում՝** Լեռնային Ղարաբաղի Հանրապետության քաղաքացիական օրենսգրքի 954-րդ հոդվածով սահմանված կառավարում:

Սույն պայմանագրում օգտագործված բոլոր վերնագրերը շարադրված են ընթերցողի հարմարության համար և չեն կարող ազդել սույն պայմանագրի մեկնաբանության վրա:

2. ԿԱՌԱՎԱՐՄԱՆ ՀԻՄՆԱԴՐԻ ՆԵՐԿԱՅԱՑՈՒՄՆԵՐԸ, ԵՐԱՇԽԻՔՆԵՐԸ, ԻՐԱՎՈՒՆՔՆԵՐԸ ԵՎ ՊԱՐՏԱԿԱՆՈՒԹՅՈՒՆՆԵՐԸ

Սույն պայմանագրով Կառավարման հիմնադիրը երաշխավորում և Հավատարմագրային կառավարչի հանդեպ ստանձնում է հետևյալ պարտավորությունները.

2.1 Օրինականացում. Սույն պայմանագիրը կնքվել է պատշաճ կերպով՝ Արցախի Հանրապետության օրենսդրությանը համապատասխան, և սույն պայմանագրի բոլոր դրույթներն ու պայմանները Կառավարման հիմնադրի համար ձեռք են բերել իրավական ուժ: Սույն պայմանագրի գործողության ընթացքում Հավատարմագրային կառավարչի սույն պայմանագրից բխող իրավունքներն ու լիազորությունները որևէ ձևով չեն սահմանափակվի և դրանց ծավալը չի նվազեցվի:

2.2 Երաշխիքներ. Արցախի Հանրապետության օրենսդրությամբ նախատեսված և բոլոր անհրաժեշտ գործողությունները, որոնք իրավասություններ են տալիս Կառավարման հիմնադրին՝ սույն պայմանագիրն իրականացնելու և կատարելու համար, ինչպես նաև Հավատարմագրային կառավարչին՝ որպես բաժնետոմսերով հավաստված իրավունքների հավատարմագրային կառավարիչ ճանաչելու համար, կատարվել են մինչև սույն պայմանագրի կնքման օրը:

2.2.1 Կառավարման հիմնադիրը երաշխավորում է, որ բաժնետոմսերը հասարակ անվանական բաժնետոմսեր են, որոնք բաժնետիրոջն իրավունք են տալիս քվեարկելու ընկերության բաժնետերերի ընդհանուր ժողովում, ստանալու շահաբաժիններ, մասնակցելու ընկերության կառավարմանը և իրականացնելու Արցախի Հանրապետության օրենսդրությամբ՝ հասարակ (սովորական) բաժնետոմսերի սեփականատիրոջ ամրագրված մյուս բոլոր իրավունքները:

2.2.2 Կառավարման հիմնադիրը երաշխավորում է, որ բաժնետոմսերն ու դրանցով հավաստված իրավունքները գրավի կամ արգելանքի տակ չեն, որևէ կերպ ծանրաբեռնված չեն երրորդ անձանց իրավունքներով և չեն հանդիսանում երրորդ անձանց հետ վեճի առարկա:

2.3 Կառավարման իրավունքը գույքի նկատմամբ. Սույն պայմանագրի ստորագրման պահից Հավատարմագրային կառավարիչն իրավասություն է ձեռք բերում կառավարելու գույքը: Հավատարմագրային կառավարչի լիազորությունները սահմանվում են Արցախի Հանրապետության օրենսդրությամբ, կանոնադրությամբ և սույն պայմանագրով:

2.4 Կառավարման հիմնադիրը պարտավոր է՝

2.4.1 Գույքի հավատարմագրային կառավարումը հանձնել Հավատարմագրային կառավարչին: Հավատարմագրային կառավարչին տրամադրել սույն պայմանագրով նախատեսված լիազորությունները և ապահովել տվյալ լիազորությունների անխոչընդոտ իրականացումը Հավատարմագրային կառավարչի կողմից:

2.4.2 Պահպանել Հավատարմագրային կառավարչի առևտրային գաղտնիքը:

2.5 Կառավարման հիմնադիրը (Կառավարման հիմնադրի լիազորած մարմինը) իրավունք ունի՝

2.5.1 Հավատարմագրային կառավարչից պահանջելու պարտականությունների կատարման ընթացում թույլ տրված թերությունների վերացում:

2.5.2 Մոնիթորինգի ենթարկելու Հավատարմագրային կառավարչի կողմից սույն պայմանագրով սահմանված պարտավորությունների կատարման ընթացքը՝ առանց միջամտելու նրա գործունեությանը:

2.5.3 Ցանկացած ժամանակ ընկերությանը տրամադրել աջակցություններ՝ ելնելով պետական ծրագրերից և ընկերության կանոնադրությամբ նախատեսված նպատակներից:

3. ՀԱՎԱՏԱՐՄԱԳՐԱՅԻՆ ԿԱՌԱՎԱՐՉԻ ՆԵՐԿԱՅԱՑՈՒՄՆԵՐԸ, ԵՐԱՇԽԻՔՆԵՐԸ, ԻՐԱՎՈՒՆՔՆԵՐԸ ԵՎ ՊԱՐՏԱԿԱՆՈՒԹՅՈՒՆՆԵՐԸ

Սույն պայմանագրով Հավատարմագրային կառավարիչը երաշխավորում և Կառավարման հիմնադրի հանդեպ ստանձնում է հետևյալ պարտավորությունները.

3.1 Լիազորություններն ու իրավասությունները. Հավատարմագրային կառավարիչն ունի լիարժեք լիազորություններ և իրավասություն՝ սույն պայմանագիրը և դրա պայմաններն ու դրույթները կատարելու համար:

3.2 Օրինականացում. Սույն պայմանագիրը կնքվել է պատշաճ կերպով, և սույն պայմանագրի բոլոր դրույթներն ու պայմանները Հավատարմագրային կառավարչի համար ձեռք են բերել իրավական ուժ:

3.3 Գույքի հաշվապահական հաշվառումը. Հավատարմագրային կառավարման հանձնված գույքն առանձնացվում է Հավատարմագրային կառավարչին պատկանող այլ գույքից: Գույքը Հավատարմագրային կառավարչի կողմից ենթարկվում է առանձին հաշվառման և արտացոլվում է առանձին հաշվեկշռում:

3.4 Հավատարմագրային կառավարիչը պարտավոր է՝

3.4.1 Սույն պայմանագրի շրջանակներում իրականացնել բաժնետոմսերով հավաստված իրավունքների հավատարմագրային կառավարումը՝ ղեկավարվելով

Արցախի Հանրապետության օրենսդրությամբ, ընկերության կանոնադրությամբ և սույն պայմանագրով:

3.4.2 Պահպանել ընկերության առևտրային գաղտնիքները:

3.4.3 Յուրաքանչյուր կիսամյակի ավարտից հետո 20 (քսան) օրացուցային օրվա ընթացքում, ինչպես նաև սույն պայմանագրի ավարտից հետո 20 (քսան) օրացուցային օրվա ընթացքում՝ Կառավարման հիմնադրի լիազոր մարմին ներկայացնել Ընկերության ծախսերի հաստատված տարեկան նախահաշիվը և կիսամյակային (վեց ամսվա) ֆինանսական հաշվետվությունները:

3.5 Հավատարմագրային կառավարիչն իրավունք ունի՝

3.5.1 Կառավարման հիմնադրից ընդունել և սույն պայմանագրով սահմանված պայմաններին համապատասխան իրականացնել Ընկերության բաժնետոմսերով հավաստված իրավունքների հավատարմագրային կառավարումը: Ցանկացած դեպքում սույն պայմանագիրը Հավատարմագրային կառավարիչին չի տրամադրում բաժնետոմսերի օտարման, գրավադրման, պահման կամ վարձակալության հանձնելու կամ այլ ձևով երրորդ անձանց փոխանցելու լիազորություն:

3.5.2 Գույքի հավատարմագրային կառավարում իրականացնելիս, սույն պայմանագրին համապատասխան և ի շահ ընկերության, կատարելու ցանկացած իրավաբանական և (կամ) այլ գործառույթ:

3.5.3 Գույքի նկատմամբ իր իրավունքների պաշտպանության համար՝ պահանջելու վերացնել հիշյալ իրավունքների ամբողջ ծավալով իրականացմանը խոչընդոտող ամեն տեսակի խախտումները կամ սահմանափակումները:

3.6 Հավատարմագրային կառավարիչի լիազորությունների շրջանակը.

3.6.1 Հավատարմագրային կառավարիչին է պատկանում Ընկերության բաժնետերերի ժողովի իրավասությանը վերապահված հետևյալ հարցերով միանձնյա որոշումն ընդունելու իրավունքը.

1) ընկերության տարեկան հաշվետվությունների, հաշվապահական հաշվեկշիռների, շահույթների և վնասների հաշվի, շահույթների և հաշիվների բաշխման հաստատում, գործառնական շահույթի վերաներդրում (հարկային պարտավորությունների կատարումից հետո).

2) ընկերության բաժնետերերի ընդհանուր ժողովի վարման կարգի հաստատում.

3) ընկերության կողմից բաժնետերերին տեղեկությունների և նյութերի հաղորդման ձևի որոշում՝ ներառյալ համապատասխան զանգվածային լրատվամիջոցների ընտրությունը, եթե հաղորդումը պետք է իրականացվի նաև հրապարակային հայտարարությամբ.

4) գործարքների կնքման մասին որոշման ընդունում (եթե գործարքի առարկա հանդիսացող գույքի արժեքը գործարքը կնքելու մասին որոշման ընդունման օրվա դրությամբ չի գերազանցում 20 000 000 (քսան միլիոն) ՀՀ դրամը.

5) ընկերության գործադիր մարմնի ձևավորում, նրա լիազորությունների վաղաժամկետ դադարեցում, ընկերության կառուցվածքի և հաստիքացուցակի հաստատում՝ նախապես խորհրդակցելով Կառավարման հիմնադրի լիազոր մարմնի հետ.

6) ընկերության կողմից իրականացվող գործունեության տեսակների և զարգացման ուղղությունների որոշում.

7) տարեկան և արտահերթ ժողովների գումարման մասին որոշման ընդունում.

8) ընկերության բաժնետերերի ընդհանուր ժողովի օրակարգի հաստատում.

9) ընկերության բաժնետերերի ընդհանուր ժողովներին մասնակցելու իրավունք ունեցող բաժնետերերի ցուցակի կազմում, ամսաթվի և ժամանակացույցի հաստատում, ինչպես նաև այն բոլոր հարցերի լուծում, որոնք կապված են ժողովների նախապատրաստման և գումարման հետ.

10) «Բաժնետիրական ընկերությունների մասին» Լեռնային Ղարաբաղի Հանրապետության օրենքի 59-րդ հոդվածով սահմանված կարգով գույքի շուկայական արժեքի որոշում.

11) ընկերության վերստուգողի վարձատրության և ծախսերի փոխհատուցման վճարման կարգի ու պայմանների հաստատում.

12) ընկերության աուդիտն իրականացնող անձի վճարման չափի սահմանում.

13) ընկերության կառավարման մարմինների գործունեությունը կանոնակարգող ներքին փաստաթղթերի հաստատում.

14) ընկերության ղեկավար անձանց աշխատանքի վարձատրության պայմանների որոշում:

3.6.2 Հավատարմագրային կառավարիչը Կառավարման հիմնադրի կամ լիազորած մարմնի կողմից իր իրավասության շրջանակներում տրված նախնական գրավոր համաձայնությամբ՝ ընդունում է հետևյալ որոշումները՝

1) կանոնադրության մեջ փոփոխությունների և լրացումների կատարում, կանոնադրության հաստատում՝ նոր խմբագրությամբ.

2) հայտարարված բաժնետոմսերի քանակի սահմանում.

3) բաժնետոմսերի անվանական արժեքի փոքրացման, բաժնետոմսերի ընդհանուր քանակի կրճատման նպատակով ընկերության կողմից տեղաբաշխված բաժնետոմսերի ձեռքբերման, ինչպես նաև ընկերության կողմից ձեռք բերված կամ հետ գնված բաժնետոմսերի մարման միջոցով կանոնադրական կապիտալի նվազեցում.

4) ընկերության բաժնետոմսերի կամ բաժնետոմսերի փոխարկվող ընկերության այլ արժեթղթերի թողարկում.

5) «Բաժնետիրական ընկերությունների մասին» Լեռնային Ղարաբաղի Հանրապետության օրենքով սահմանված դեպքերում ընկերության տեղաբաշխված բաժնետոմսերի, պարտատոմսերի և այլ արժեթղթերի ձեռքբերման վերաբերյալ որոշման ընդունում.

6) բաժնետոմսերի համախմբում (կոնսոլիդացիա), բաժանում.

7) բաժնետոմսերի անվանական արժեքի մեծացման կամ լրացուցիչ բաժնետոմսերի տեղաբաշխման միջոցով կանոնադրական կապիտալի չափի ավելացում.

8) ընկերության կողմից տեղաբաշխված բաժնետոմսերի ձեռքբերում և հետզնում.

9) գործարքների կնքման մասին որոշման ընդունում (եթե գործարքի առարկա հանդիսացող գույքի արժեքը գործարքը կնքելու մասին որոշման ընդունման օրվա դրությամբ 20 000 000 (քսան միլիոն) ՀՀ դրամից ավելին է)։

10) անշարժ գույքի օտարման կամ ձեռքբերման գործարքների կնքման մասին որոշման ընդունում։

11) այնպիսի գործարքների կնքում, որոնցում առկա է շահերի բախում։

12) պարտատոմսերի և այլ արժեթղթերի տեղաբաշխման մասին որոշման ընդունում։

13) ընկերության աուդիտն իրականացնող անձի ընտրություն: Ընդ որում, ընկերության աուդիտը պետք է իրականացվի տարեկան մեկ անգամ, անկախ աուդիտորական կազմակերպության կողմից, որի հետ ընկերությունը կնքում է առանձին պայմանագիր։

14) ընկերության ներկայացուցչությունների և մասնաճյուղերի ստեղծում, դրանց կանոնադրությունների հաստատում, դրանց գործունեության նպատակահարմարության վերանայում և լուծարում:

3.6.3 Հավատարմագրային կառավարչի՝

սույն պայմանագրի 3.6.2-րդ կետի պահանջների պահպանմամբ ներկայացված առաջարկությունը ստանալու պահից 30 (երեսուն) աշխատանքային օրվա ընթացքում, բացառությամբ սույն պայմանագրի 3.6.2-րդ կետի 10-րդ ենթակետում սահմանված դեպքի, Կառավարման հիմնադիրը կամ նրա լիազորած մարմինը պետք է գրավոր ներկայացնի իր համաձայնությունը կամ առարկությունը: Եթե Հավատարմագրային կառավարչի հարցումը ստանալուց 30 (երեսուն) աշխատանքային օրվա ընթացքում Կառավարման հիմնադիրը կամ նրա լիազորած մարմինն իր գրավոր համաձայնությունը կամ առարկությունը չի ներկայացնում, ապա Հավատարմագրային կառավարչի կողմից հարցման առարկա հանդիսացող որոշման ընդունումը համարվում է համաձայնեցված:

Հավատարմագրային կառավարչի՝ սույն պայմանագրի 3.6.2-րդ կետի 10-րդ ենթակետում նշված հարցերով որոշումների ընդունմանը վերաբերող առաջարկության վերաբերյալ Կառավարման հիմնադիրը կամ նրա լիազորած մարմինը պետք է իր գրավոր համաձայնությունը կամ մերժումը Հավատարմագրային կառավարչին ներկայացնի առաջարկությունը ստանալուց հինգ աշխատանքային օրվա ընթացքում, եթե կողմերի միջև այդ ժամկետի վերաբերյալ այլ բան գրավոր չի նախատեսվել: Եթե Հավատարմագրային կառավարչի հարցումը ստանալուց հինգ աշխատանքային օրվա ընթացքում Կառավարման հիմնադիրը կամ նրա լիազորած մարմինն իր գրավոր համաձայնությունը կամ պատճառաբանված առարկությունը չի ներկայացնում, ապա Հավատարմագրային կառավարչի կողմից հարցման առարկա հանդիսացող որոշման ընդունումը համարվում է համաձայնեցված:

3.7 Սույն պայմանագրի գործողության ժամկետի ավարտից առնվազն մեկ ամիս առաջ Հավատարմագրային կառավարչի ապահովում է ընկերությունում աուդիտի իրականացումը և մինչև սույն պայմանագրի ավարտն արդյունքները ներկայացնում է Կառավարման հիմնադրին: Ընդ որում, սույն կետում նշված աուդիտ իրականացնող ընկերության ընտրությունը կատարվում է՝ նախապես համաձայնեցնելով Կառավարման հիմնադրի հետ:

4. ԿՈՂՄԵՐԻ ՊԱՏԱՍԽԱՆԱՏՎՈՒԹՅՈՒՆԸ

4.1 Սույն պայմանագրի չկատարման կամ ոչ պատշաճ կատարման, ինչպես նաև միմյանց հասցված վնասների համար կողմերը պատասխանատու են իրենց գույքով և միջոցներով:

4.2 Հավատարմագրային կառավարիչն իր պարտականությունների կատարման ընթացքում պետք է գործի՝ ելնելով ընկերության շահերից, բարեխիղճ և խելամիտ կերպով:

4.3 Հավատարմագրային կառավարիչը պարտավորվում է ձեռնարկել բոլոր անհրաժեշտ քայլերը, որոնք թույլ չեն տա գույքի հավատարմագրային կառավարման հետ կապված գործողությունների արդյունքում երրորդ անձանց հանդեպ առաջացած պարտականությունները կատարել բաժնետոմսերի հաշվին և բաժնետոմսերը գերծ կպահեն Լեռնային Ղարաբաղի Հանրապետության քաղաքացիական օրենսգրքի 962-րդ հոդվածի 2-րդ մասով և 964-րդ հոդվածի 3-րդ մասով սահմանված բացասական հետևանքներից:

4.4 Սույն պայմանագրի 4.1-ին կետով նախատեսված պատասխանատվության չափը չի կարող գերազանցել ընկերության զուտ ակտիվների արժեքը:

4.5 Հավատարմագրային կառավարիչը Արցախի Հանրապետության օրենսդրությամբ սահմանված կարգով պատասխանատվություն է կրում իր գործողության (անգործության) հետևանքով ընկերությանը պատճառած վնասների համար:

4.6 Հավատարմագրային կառավարչի հրաժարականը կամ սույն պայմանագրով նախատեսված պարտավորություններից ազատումը նրան չի ազատում իր կառավարման ընթացքում ընկերությանը հասցրած վնասների համար պատասխանատվությունից:

4.7 Հավատարմագրային կառավարիչը պատասխանատվություն է կրում պատճառված վնասների համար, եթե չի ապացուցում, որ այդ վնասներն առաջացել են անհաղթահարելի ուժի ազդեցության, Կառավարման հիմնադրի պատճառով:

4.8 Հավատարմագրային կառավարիչը պատասխանատվություն է կրում իրեն տրամադրված լիազորությունների գերազանցմամբ կամ դրանց համար սահմանված սահմանափակումների խախտմամբ կնքված գործարքի համար:

4.9 Ոչ մի պարագայում կողմերից մեկը չի կարող մյուս կողմին պատասխանատվության ենթարկել՝ իր կողմից թույլ տրված անփութության կամ սույն պայմանագրով նախատեսված պարտավորությունների խախտման հետևանքով տեղ գտած վնասների ու կորուստների կամ հնարավոր կորուստների (լինի շահույթի, թե այլ կորուստ) համար:

4.10 Սույն պայմանագրի իմաստով՝ որպես պարտավորության խախտման դեպք սահմանվում է հետևյալը՝

4.10.1 Կողմը չի կատարում սույն պայմանագրով սահմանված պայմանները, ժամկետները և ընթացակարգերը:

4.10.2 Կողմը չի վերացնում նման խախտումը՝ այդ խախտման մասին գրավոր ծանուցում ստանալու օրվանից 30 (երեսուն) աշխատանքային օրվա ընթացքում:

4.11 Կողմերի հարաբերությունները, նրանց որևէ մեկի կողմից սույն պայմանագրով ստանձնած իր պարտավորությունների չկատարման դեպքում,

կարգավորվում են Արցախի Հանրապետության օրենսդրությամբ սահմանված կարգով:

4.12 Երբ կողմերից մեկը չի կատարում իր պարտավորությունները, մյուս կողմը պետք է պարտավորությունների չկատարման վերաբերյալ ծանուցում ներկայացնի խախտող կողմին՝ կցելով ստեղծված իրավիճակին առնչվող փաստերի համառոտ նկարագիրը և տվյալ կողմի պարտավորությունների չկատարումը հիմնավորող փաստաթղթերը:

4.13 Պարտավորությունների չկատարման մասին սույն պայմանագրի 4.10.2-րդ կետով սահմանված ծանուցումը ստանալուց ոչ ուշ, քան 15 (տասնհինգ) աշխատանքային օրվա ընթացքում՝ խախտող կողմը պետք է ներկայացնի համապատասխան բացատրություններ, որոնց հիման վրա հակառակ կողմը որոշում է իր ձեռնարկելիք հետևյալ քայլերը՝

1) վարել խորհրդակցություններ կամ բանակցություններ՝ հակասությունները և տարաձայնությունները բանակցելու միջոցով հարթելու նպատակով, կամ

2) խախտող կողմին ճանաչել պարտավորությունները չկատարող կողմ և ձեռնարկել սույն պայմանագրով և Արցախի Հանրապետության օրենսդրությամբ նախատեսված գործողություններ:

4.14 Կողմերից յուրաքանչյուրը՝ անկախ սույն հոդվածով նախատեսված կարգից, իրավունք ունի ձեռնարկելու Արցախի Հանրապետության օրենսդրությամբ չարգելված ցանկացած քայլեր, եթե պարզի, որ սույն պայմանագրով մյուս կողմի գործողությունն իր շահերը վտանգի տակ է առնում:

5. ԸՆԿԵՐՈՒԹՅԱՆ ԳՈՐԾԱՌՈՒՅԹՆԵՐԸ

5.1 Լեռնային Ղարաբաղի Հանրապետության գյուղատնտեսության նախարարության «Տոհմային կայան» փակ բաժնետիրական ընկերությունը հանդիսանում է Արցախի Հանրապետության տարածքում տոհմային գործունեության զարգացմամբ և տոհմային անասնաբուծության բնագավառում պետական ծրագրերի իրականացմամբ զբաղվող կազմակերպություն, որն իրավասու է զբաղվել Լեռնային Ղարաբաղի Հանրապետության կառավարության 2008 թվականի ապրիլի 1-ի N 239 որոշմամբ և Հավատարմագրային կառավարչի կողմից սահմանված գործունեության տեսակներով:

6. ՊԱՅՄԱՆԱԳՐԻ ԳՈՐԾՈՂՈՒԹՅԱՆ ԺԱՄԿԵՏԸ, ՎԱՂԱԺԱՄԿԵՏ ԴԱԴԱՐԵՑՄԱՆ ՀԻՄՔԵՐԸ ԵՎ ՓՈՓՈԽՈՒՄԸ

6.1 Սույն պայմանագիրն ուժի մեջ է մտնում 2018 թվականի _____-ին և գործում է մինչև 20__ թվականի _____-ը:

6.2 Սույն պայմանագրի առևտրային տեղեկատվություն պարունակվող դրույթների գաղտնիությունը պետք է պահպանվի սույն պայմանագրի ամբողջ գործողության ընթացքում և գործողության ավարտից հետո առնվազն 12 ամիս:

6.3 Սույն պայմանագիրը կարող է վաղաժամկետ դադարեցվել կողմերի համաձայնությամբ:

6.4 Սույն պայմանագիրը կարող է վաղաժամկետ դադարեցվել նաև հետևյալ յուրաքանչյուր հիմքով՝

6.4.1 Կառավարման հիմնադիրը զգալիորեն խախտել է, հետևողականություն չի պահպանել կամ չի կատարել սույն պայմանագրի որևէ դրույթ կամ պայման, կամ խախտել է սույն պայմանագրով իր կողմից տրված որևէ ներկայացում կամ երաշխիք պարունակող պայման և հիշյալ խախտման մասին Հավատարմագրային կառավարչի ծանուցումը ստանալուց հետո 30 (երեսուն) օրացուցային օրվա ընթացքում Կառավարման հիմնադրի կողմից խախտումը չի վերացվել: Նման դեպքում Հավատարմագրային կառավարիչն իրավասու է վաղաժամկետ դադարեցնել սույն պայմանագիրը՝ Կառավարման հիմնադրին 180 (հարյուր ութսուն) օրացուցային օր առաջ գրավոր կերպով ծանուցելու միջոցով:

6.4.2 Հավատարմագրային կառավարիչը զգալիորեն խախտել է, հետևողականություն չի պահպանել կամ չի կատարել սույն պայմանագրի որևէ դրույթ կամ պայման, կամ խախտել է սույն պայմանագրով իր կողմից տրված որևէ ներկայացում կամ երաշխիք պարունակող պայման և հիշյալ խախտման մասին Կառավարման հիմնադրի ծանուցումը ստանալուց հետո 30 (երեսուն) օրացուցային օրվա ընթացքում Հավատարմագրային կառավարչի կողմից խախտումը չի վերացվել: Նման դեպքում Կառավարման հիմնադիրն իրավասու է վաղաժամկետ դադարեցնել սույն պայմանագիրը՝ Հավատարմագրային կառավարչին 180 (հարյուր ութսուն) օրացուցային օր առաջ գրավոր կերպով ծանուցելու միջոցով:

6.4.3 Անհաղթահարելի ուժի ներգործության կամ Արցախ Հանրապետության օրենսդրության կամ ընկերության գործունեության նկատմամբ վերջինիս կիրառումը փոփոխվելու հետևանքով, որի արդյունքում հավատարմագրային կառավարման ընթացքն ընդհատվում է կամ Հավատարմագրային կառավարչի կողմից հավատարմագրային կառավարում իրականացնելու կարողությունը զգալիորեն նվազում, և նմանատիպ ցանկացած իրավիճակ տևում է 180 (հարյուր ութսուն) օրացուցային օր կամ ավելի (Ֆորսմաժորային իրավիճակի դեպքում) կամ 90 (իննսուն) օրացուցային օր (օրենսդրության փոփոխության դեպքում): Նման դեպքում Հավատարմագրային կառավարիչը գրավոր կերպով ծանուցում է Կառավարման հիմնադրին և, եթե ծանուցումը ստանալու պահից 90 (իննսուն) օրացուցային օրվա ընթացքում Կառավարման հիմնադիրը իրավիճակի շտկմանն ուղղված որևէ քայլեր չի ձեռնարկում, ապա Հավատարմագրային կառավարիչն իրավասու է վաղաժամկետ դադարեցնել սույն պայմանագիրը՝ Կառավարման հիմնադրին 180 (հարյուր ութսուն) օրացուցային օր առաջ գրավոր կերպով ծանուցելու միջոցով:

6.4.4 Հարկերի և հարկադիր այլ վճարումների զգալի ավելացման դեպքում, որոնք անհատապես կամ միատեղ բացասաբար են անդրադառնում տոհմային գործունեության զարգացման և տոհմային անասնաբուծության բնագավառում պետական ծրագրերի վրա, և նյութապես և էականորեն ազդում ընկերության գործառնական շահույթի վրա:

6.5 Սույն պայմանագիրը վաղաժամկետ դադարեցվելու դեպքում՝ կողմերը պետք է մանրամասն հրահանգեն միմյանց սույն պայմանագրին առնչվող յուրաքանչյուր և բոլոր փաստաթղթերի և միջոցների վերադարձման, պահպանման կամ տեղաբաշխման վերաբերյալ, որից հետո հիշյալ փաստաթղթերը և միջոցները պետք է անցնեն կողմերից որևէ մեկի տնօրինման կամ հսկողության ներքո:

6.6 Սույն պայմանագիրը վաղաժամկետ դադարեցվելու դեպքում՝ կողմերի միջև պետք է կազմվի համապատասխան արձանագրություն, որը կամրագրի կողմերի բոլոր այն իրավունքներն ու պարտականությունները, որոնք շարունակելու են գործել սույն պայմանագրի դադարեցումից հետո կամ կարող են ծագել պայմանագիրը դադարեցվելու հետևանքով:

6.7 Սույնով կողմերը համաձայնվում են, որ չեն կարող փոխանցել որևէ երրորդ անձի սույն պայմանագրից բխող իրենց առանձին իրավունքներն ու պարտականությունները, ինչպես նաև սույն պայմանագիրն ամբողջ ծավալով, բացառությամբ այն դեպքերի, երբ իրավունքներն ու պարտավորությունները փոխանցվում են իրավահաջորդության կարգով՝ Արցախի Հանրապետության օրենսդրությամբ ամրագրված պահանջների պահպանմամբ:

6.8 Կողմերից յուրաքանչյուրի իրավահաջորդը պետք է ուղղակիորեն ստանձնի սույն պայմանագրով տվյալ կողմի ստանձնած իրավունքներն ու պարտավորությունները, այդ թվում՝ այն իրավունքներն ու պարտավորությունները, որոնք առնչվում են հնարավոր վեճերի ու տարաձայնությունների կարգավորման հետ:

6.9 Սույն պայմանագրում յուրաքանչյուր փոփոխություն կամ լրացում պետք է կատարվի կողմերի միջև գրավոր կերպով փոխհամաձայնեցվելու դեպքում:

7. ԱՆՀԱՂԹԱՀԱՐԵԼԻ ՈՒԺԻ ՆԵՐԳՈՐԾՈՒԹՅՈՒՆ (ՖՈՐՍ-ՄԱԺՈՐ)

7.1 Կողմերն ազատվում են պատասխանատվությունից սույն պայմանագրով իրենց ստանձնած պարտավորությունները չկատարելու կամ ուշացումով կատարելու համար, եթե դա տեղի է ունեցել սույն պայմանագրի ստորագրման օրվանից հետո, կողմերի ողջամիտ հսկողությունից դուրս հանգամանքներում: Այդպիսի իրավիճակներ են երկրաշարժը, ջրհեղեղը, հրդեհը, պատերազմը, ռազմական և արտակարգ դրություն հայտարարելը, քաղաքական հուզումները, գործադուլները, հաղորդակցության միջոցների աշխատանքի դադարեցումը, պետական մարմինների ակտերը և այլն, որոնք անհնարին են դարձնում սույն պայմանագրով պարտավորությունների կատարումը:

7.2 Ֆորսմաժորային իրավիճակ ծագելու դեպքում տուժող կողմը պետք է անհապաղ մյուս կողմին ծանուցի այդ մասին՝ հանգամանքների մանրամասն նկարագրությամբ և առաջարկելով միջոցառումներ հնարավորին սեղմ ժամկետում իրավիճակը շտկելու ուղղությամբ:

7.3 Անհաղթահարելի ուժի ազդեցությունը դադարելուց հետո, տուժող կողմը պետք է անհապաղ ձեռնամուխ լինի սույն պայմանագրով ստանձնած իր պարտականությունների կատարմանը, որոնք կասեցվել կամ դադարեցվել էին այդպիսի երևույթի հետևանքով:

7.4 Եթե անհաղթահարելի ուժի ազդեցությունը տևում է ավելի քան վեց ամիս, կողմերը պետք է անհապաղ նախաձեռնեն բանակցային գործընթաց՝ սույն պայմանագրով սահմանված պարտականությունների կատարումն ապահովելու նպատակով:

8. ՕՐԵՆՍԴՐԱԿԱՆ ԿԱՐԳԱՎՈՐՈՒՄԸ

8.1 Սույն պայմանագրի կատարման, դադարեցման կամ լուծման կապակցությամբ կողմերի միջև ծագած վեճերն ու տարաձայնությունները, կամ սույն պայմանագրին առնչվող ցանկացած այլ վիճելի հարցերն ու տարակարծությունները կարգավորվում են Արցախի Հանրապետության օրենսդրությամբ:

8.2 Եթե Հավատարմագրային կառավարչի և Կառավարման հիմնադրի միջև սույն պայմանագրի դրույթներին առնչվող կամ դրանցից բխող վեճերը և տարաձայնությունները ծագման պահից 60 (վաթսուն) օրացուցային օրվա ընթացքում լուծում չեն գտնում, ապա դրանց լուծումն իրականացվում է Արցախի Հանրապետության դատարանների միջոցով:

8.3 Դատարանի կողմից սույն պայմանագրի դրույթներից մեկն անվավեր կամ չեղյալ ճանաչվելը չի կարող ազդել սույն պայմանագրով ամրագրված մնացյալ դրույթների վավերականության վրա, իսկ անվավեր կամ չեղյալ ճանաչված դրույթը պետք է փոխարինվի նոր դրույթով, որը կբխի գործող օրենքներից և իմաստային առումով հնարավորին չափ մոտ կլինի սկզբնական դրույթին՝ ծառայելով վերջինիս գործառնական նպատակի ամրագրմանը:

9. ԱՅԼ ԴՐՈՒՅԹՆԵՐ

9.1 Փոփոխություն և չեղյալացում. Սույն պայմանագրի որևէ կետի անվավեր, չեղյալ, չգործող կամ Արցախի Հանրապետության օրենսդրությանը չհամապատասխանող ճանաչվելը, չի ազդում սույն պայմանագրի մյուս կետերի ամբողջ ծավալով կիրառելիության վրա: Սույն պայմանագրի որևէ կետ անվավեր կամ անիրագործելի ճանաչվելու դեպքում, կողմերը պետք է անմիջապես հոժարակամ կերպով նախաձեռնեն բանակցային գործընթաց՝ փորձելով փոփոխել այդ կետն ու դարձնել այն կիրարկելի և իմաստային առումով հնարավորին չափ մոտ սկզբնական դրույթին՝ ծառայելով վերջինիս գործառնական նպատակի ամրագրմանը:

9.2 Լիակատար պայմանագիր. Սույն պայմանագիրը և դրանով ամրագրված դրույթները ներկայացնում են կողմերի միջև ձեռք բերված լիակատար համաձայնությունը և գերակայում են սույն պայմանագրին նախորդող ժամանակահատվածում կողմերի միջև ձեռք բերված բոլոր բանավոր կամ գրավոր պայմանավորվածությունների ու համաձայնությունների նկատմամբ:

9.3 Ծանուցումներ. Սույն պայմանագրի դրույթներին վերաբերող բոլոր ծանուցումները, պահանջները և համապատասխան այլ թղթաբանությունը պետք է կատարվի գրավոր և ուղարկվի հետևյալ հասցեներով՝

Ուղղված Կառավարման հիմնադրին՝

Հասցեն՝ քաղաք Ստեփանակերտ, Թումանյանի 115

Հեռախոսահամարը՝ (+374) 47 94-09-49

Ուղղված Հավատարմագրային կառավարչին՝

Հասցեն՝ քաղաք Շուշի, Աշոտ Բեկորի 4

Հեռախոսահամարը՝ (+374) _____

Հասցեների կամ տվյալների փոփոխման դեպքում կողմերը պարտավոր են կանխավ տեղեկացնել միմյանց այդ մասին:

9.4 Լեզուն. Կողմերի միջև հաղորդակցության լեզուն հայերենն է: Պահանջվող փաստաթղթերի օտար լեզվով թարգմանությունը պետք է ապահովի ընկերությունը:

9.5 Ներկայացումների և երաշխիքների վավերականությունը. Սույն պայմանագրի ներքո կողմերի կատարած ներկայացումները, երաշխիքները և պարտավորությունները ուժի մեջ են մտնում սույն պայմանագրի ստորագրման պահից և գործում են սույն պայմանագրի գործողության ամբողջ ընթացքում:

9.6 Գաղտնիությունը. Կողմերից ոչ մեկը չի կարող հայտնել կամ հրապարակել սույն պայմանագրով նախատեսված գործարքի վերաբերյալ որևէ տեղեկություն՝ առանց մյուս կողմի նախնական գրավոր համաձայնության:

Ի հավաստումն վերոգրյալի. Կողմերը ստորագրեցին սույն պայմանագիրը՝ 4 (չորս) օրինակից, հայերեն լեզվով, որոնցից յուրաքանչյուրը համարվում է բնօրինակ և կողմերի համար ունի հավասար իրավաբանական ուժ: Յուրաքանչյուր կողմին տրվում է երկու օրինակ, որոնցից մեկական օրինակները պահվում են ընկերություններում, իսկ մեկական օրինակներ տրամադրվում են բաժնետոմսերի կառավարումն իրականացնող կազմակերպություններին:

10. ԿՈՂՄԵՐԻ ԱՏՈՐԱԳՐՈՒԹՅՈՒՆՆԵՐԸ ԵՎ ՀԱՍՑԵՆԵՐԸ

Կառավարման հիմնադիր

Կառավարման հիմնադրի ներկայացուցիչ
Արցախի Հանրապետության
գյուղատնտեսության նախարարություն
Արցախի Հանրապետություն,
ք. Ստեփանակերտ, Թումանյանի 115
գրանցման համարը՝ 443.180.00012
ՀՎՀՀ 90005198
Կենտրոնական գանձապետարան
գ/ե 915011495024

Հավատարմագրային կառավարիչ

«Ագրո Արց» ՍՊԸ
Արցախի Հանրապետություն,
ք.Շուշի, Աշոտ Բեկորի 4
գրանցման համարը՝ 445.110.1005323
ՀՎՀՀ 90343093
«Հայբիզնեսբանկ» ՓԲԸ
1150006841481444

(ստորագրություն)

(ստորագրություն)

ԱՐՑԱԽԻ ՀԱՆՐԱՊԵՏՈՒԹՅԱՆ ՆԱԽԱԳԱՀԻ ԱՇԽԱՏԱԿԱԶՄԻ
ԿԱՌԱՎԱՐՈՒԹՅԱՆ ԳՈՐԾԵՐԻ ԿԱՌԱՎԱՐՉՈՒԹՅԱՆ
ՊԵՏ-ԱՇԽԱՏԱԿԱԶՄԻ ՂԵԿԱՎԱՐԻ ԱՌԱՋԻՆ ՏԵՂԱԿԱԼ

Ա. ԼԱԶԱՐՅԱՆ